

GUICHI NI BĒ SAN JUDAS APÓSTOL

**Guichi ni bĕ Judas use'ela'nĕ'n
lao yaca ben' nao xneza Jesús**

¹Nĕ'ĕdi', Judas, naca' ben' rue mandado quie Jesucristo. Naca' bicha' Santiago. Guichi ni bia' use'ela'n laole le'e, ben' ulio Diuzi. Nadyĕ'ĕ Xuzi Diuzi le'e, zunĕ' rna'nĕ' le'e. ²Rulidza' Diuzi ta yeyĕchi'la'adyi'nĕ' le'e dyĕ'ĕdi, lĕscan' ta cuĕchinĕ' chizi laxta'ole idyĕ'lĕnĕ' le'e taĕe.

Rnĕ Judas quie yaca ben' huezi' yĕ'
(2 Pedro 2.1-17)

³Bicha', lega re'enda' ise'ela' tu guichi laole ta inia' le'e mazara cabĕ' bĕ Diuzi bĕnnĕ' yela' neban quiero tuzioli. Ruen dyabĕ' ise'ela' tu guichi laole ta inia' le'e cabĕ' reya'ala' huele, reya'ala' gapale cuidado ta bisi' benĕ' le'e yĕ'. Reya'ala' hue quiele xti'idza' Diuzi ca di'idza' pca'n Diuzi lao na'a yaca ben' quienĕ'. ⁴Cana' nia', porque balarazi aoyu'u ben' huezi' yĕ' ladole. Yaca ben' na' najĕ' bibi huena chi huero tabayatza cabĕ' rnan quiero. Najĕ' bihue Diuzi ra'o castigo, porque dan' nadyĕ'lĕnĕ' ra'o. Pero bĕ' nazijĕ' yĕ' rzi'jĕ' binacan cana'. Nacajĕ' ben' mala,

ben' rudyiala'adyi' Jesucristo. Tuzi Jesucristo naquĕ' xa'nro, ben' Señor quiero. Pero lĕjĕ' rnajĕ' bibi zaca'nĕ'. Pues desde cana'te rnĕn lĕ'ĕ guichi la'iya quie Diuzi bi gaca quie ben' rna cana'. Rnĕn huachugubĕ' Diuzi lĕjĕ' dza gaca juicio.

⁵Anezile dyĕ'lĕdi cabĕ' bĕ Diuzi cana'te, pero decazide re'enda' yeza'la'adyi'le tatula. Bigala'adyi'le cabĕ' guca caora unita' yaca ben' Israel nación Egipto. Psaca ben' Egipto ben' Israel bizinaquezi, pero pte psela Diuzi lĕjĕ', uchugubĕ'cazi Diuzi quie balajĕ'. Uchugubĕ'nĕ' quie yaca ben' bigule quienĕ' cabĕ' unĕ'. ⁶Lĕzi bigala'adyi'le cabĕ' guca quie bala ángel. Bigulejĕ' cabĕ' una Diuzi, na' berojĕ' ga banaca xlatojĕ'. Caora na' bĕ Diuzi mandado uyu'ujĕ' ga naca chula ta iriojĕ' caden para bira yerojĕ'. Na' yu'ujĕ' rbezajĕ' dza gaca juicio. ⁷Lĕzi quie ja ben' ciudad Sodoma, len ja ben' ciudad Gomorra, len ja ben' yedyi re' ga'ala', bigala'adyi'le cabĕ' ta uĕzacajĕ'. Bigulejĕ' quie Diuzi cabĕ' bigule ja ángel dza na'. Bĕjĕ' bizinaque, gusilĕjĕ' nigula binaca ŕgulajĕ', hasta gusilĕjĕ' laguedyi byujĕ' ca nigula. Pues lente be'mbyu lente nigula bĕjĕ'

bizinaquezi. Quie lena' uchugubé' Diuzi quiejé', aoyejé' tzalasagazi cuenda na' inezi yaca bené' de que ratza Diuzi cabé' tamala bějé'.

⁸Cabé' bē ja ben' unita' tiempo, cana' ruerē ben' huezi' yē' uyu'u ladole. Ca ben' xusa, ruelējé' cuinjé' tabayatza. Biralejé' quie Diuzi.

Rutasi runiojé' yaca ben' r nabé' zu guibá. ⁹Bigala'adyi'le cabé' bē xan' ángel laohué' Miguel.Lao cuerpo quie Moisés bēléné' xan' taxi'ibi' huenē. Pero yela' ben' huen quiené', biptasi bnioné' xan' taxi'ibi'. Lēzi biudaoné' xan' taxi'ibi' xquia. Pero uné xan' ángel rēbiné' xan' taxi'ibi': "Huaó Jesucristo lué' xquia."

¹⁰Na'ra yaca ben' na', ben' huezi' yē' uyu'u ladole, ta birioñe'ejé' na' rudyiala'adyi'jé'. Nacajé' ca bia guixi', biyu'ujé' pensari. Dula' napajé' cuinzijé' gata' castigo quiejé' tuzioli.

¹¹Gaca bayēchi' gula quiejé' nun quie naojé' ruejé' cabé' bē Caín. Yela' rza'la'adyi' dumi quiejé', ruejé' cabé' bē Balaam cana'te. Huacarē bayēchi' quiejé' cabé' guca quie tu ben' lao Coré cana'te. Guca quie Coré uchugubé' Diuzi lēbē', como dan' bdyiala'adyi'né' Diuzi. ¹²Naca yela' stu' quiele, como dan' raolēle lējé' tuže ga redupale ruele culto len ben' bichile, ben' nao xneza Jesús. Dan' rudyiala'adyi'jé' Diuzi, bireya'ala' gaolēle lējé' tuže. Puro quiezijé' re'enjé' gata'. Naca quiejé' ca quie beo bidyi ru'unan be bedun'. Lēzi naca quiejé' ca quie yaga gu'udzo na' reyalan, birbian tažixi. Cana' naca quiejé', como dan' biralejé' quie Diuzi. ¹³Naca quieyaquē' ca quie bdyin' ta rzé

ru'a yao že dupen bēbi. Rdayaquē' rnētzegueyaquē', pero yē' rzi'jé'. Naca quieyaquē' ca tu bélo bizun xlaton. Bire'enjé' inaojé' xneza Jesús. Quie lena' udixu Diuzi tu lato chula ga yu'ujé' tuzioli.

¹⁴Bigala'adyi'le quie tu ži'isuba Adán, ben' uzu tiempote laohué' Enoc. Tanun quie Diuzi unēné' quie ja ben' rdyiala'adyi' Diuzi caora unēné' gudyinē' laguedyinē' cani: "Huadyin dza cati guida Xuziro Diuzi lēné' yugulute yaca ángel quiené'. ¹⁵Caora na' huené' juicio quie lao yugulute ja bené' rue xquia, ja ben' rdyiala'adyi' lēbē'. Huené' lējé' castigo nun quie unējé' di'idza' bayatza bdyiala'adyi'jé' Diuzi." Cana' una Enoc gudyinē' laguedyinē' cana'te. ¹⁶Na'ra yaca ben' rdyiala'adyi' Diuzi, puro huaó xquia laguedyi ruejé'. Puro ta rnazin quiejé' ruejé'. Ruejé' cuinjé' že. Cuenda huejé' gan ta de quie bené', lena' ru'elējé' bené' di'idza' dya'a, pero bē' rnazijé'.

Consejo dya'a ru'e apóstol Judás yaca ben' nao xneza Jesús

¹⁷Pero le'e, bicha', bigala'adyi'le con cabé' una yaca apóstol quie Señor quiero Jesucristo cana'te. ¹⁸Cani unajé' gudyijé' laguedyjé': "Za' yeyudyi quie yedyi layu ga ržidyicala ja bené' quie xti'idza' Diuzi, ga ruejé' ta rnazin quiejé', ga birapajé' Diuzi bala'ana." Cana' una yaca apóstol dza na', unayaquē' ca hue ben' na'. ¹⁹Lēzi quie ben' na' rnía' de que raxejé' tzu'ujé' huedila cuenda huejé' laguedyjé' chopa cue'. Biyu'u Bichi Be quie Diuzi lu'u guicho laxta'ojé'.

²⁰Pero le'e, bicha', huele tzutzu biyehuédile inaole xneza Jesús. Ulenaba Bichi Be quie Diuzi ta gacalënë' le'e ta hue'lële Diuzi di'idza'. ²¹Yugu dza reya'ala' yeza'la'adyi'ro Diuzi cabë' ruenë' nadyë'ënë' ra'o. Reya'ala' cuezaro dyë'ëdi dza yezi' Señor quiero Jesucristo ra'o, dza yeyëchi'la'adyi'në' ra'o gunnë' yela' naban quiero ta biyeyudyi yedu.

²²Reya'ala' uxi'idze'ro dyë'ëdi ben' binenezi, ben' nerue pensari chi naojë', chi biinaojë' xneza Jesús. ²³Reya'ala' yëbiro benë' ta bihuejë' xquia, porque chi huejë' xquia, huabiagui'jë' cabë' rbiagui' ta yu'u lagui' reina. Reya'ala' yeyëchi'la'adyi'ro ben' rue xquia, porque naca bayëchi' gula quiejë'. Reya'ala' gacalërojë' ta usanjë' bira

huejë' tamala. Pero con cuidado gacalërojë' tacuenda bitzu'uro pensari huerëro xquia cabë' rue lëjë'.

**Ga iyudyi guichi ni, bë
Judas Diuzi ben' že**

²⁴⁻²⁵Naca Diuzi ben' racalë ra'o ta bira inaoro huero tamedian. Dyin quienë' nacaro ben' laxta'o yëri, binaparo xquia yedaohuero yedyinro laohuë'. Tuzi Diuzi naquë' ben' bala'ana quie lao yugulutero. Tuzi lëbë' r nabë'në' quie lao dužete. Tuzi lëbë' reya'ala' gapala'n yugu benë'. Tuzi lëbë' rute ruselanë' ra'o tanun quie ži'inë' Jesucristo. Tuzioli naca Diuzi ben' žera, la'acazi dza na'la, la'acazi na'a, la'acazi dza zaza'ra. Amén.